




Literatura den Bon Dia

Ernesto E. Rosenstand



COMPANASHI

Cronica di recuerdonan scondi

Nan tabata pa nan cuenta. Nan tabata pensa cu leu for di nan lugar por haci y deshaci. Ningun hende tabata conoce nan. Anto pakico preocupa. Y esei mes tabata haci cu nan tabata laga bai... sin ningun sorto di freno. Na zona bananera ganamento bon a susha cabes di hopi. Pasobra esei tabata un feit. Esunnan cu kier a traha tabata gana bon. Ma mester bisa tambe cu nan tabata malgasta masha hopi placa sin tin mester. Nan a cuminsa haci loke na nan pais ni pensa nan por a pensa. Orgianan increibel tabata ser organisa tur caminda. Fin di siman tabata laga tur freno los. Zona bananera tabata un extencion di tereno yen di mata di banana. Manera e nomber mes ta bisa. Unda cu bo pasa ta mata di banana bo tabata mira. Mas tanto bacoba. Un lama berde! Y ta e lama berde aki a haci cu e temponan ei tabatin bida na e region aki. No solamente na tera, ma tambe riba lama. Barco di tur parti di mundo tabata bin busca banana. Y nan tabata haya esaki for di zona bananera cu tabata parce cu nunca lo stop di produci banana, cu bacoba.

Treinnan larguisimo y pata pata tabata bai bin ora cu tabatin barco aden. Tabata un goso mira e treinnan bin asina carga cu cacho di bacoba grandi y bunita. Dia tin barco aden ta fiesta tabatin banda di waf. E ciudad tabata vibra. E tabata biba! Di e temponan ei tabata e cantica:

“Santa Marta tiene tren,
Santa Marta tiene tren,
pero no tiene tramvia.”

Movemento enorme banda di waf. No di trahado so! Ma tur clase di hende bo tabata mira ta cana rond ei banda. E trahadonan tabata yega pa husta e dia y si nan logra anto nan tabata keda traha sin stop. Dia cu tabatin barco aden Santa Marta no tabata drumi. Banda di waf tabatin movemento nunca bisto. No tabatin cuenta di traha warda. Ta cuminsa carga e barco y ta sigui traha te ora cu nan bin cla. Di e manera aki nan tabata caba mas lihe y nan tabata gana masha hopi placa. Esei pasobra nan tabata haya overtime paga.

Mester ta franco y bisa cu e hendenan e temponan ei tabata gana bon na Santa Marta. Practicamente tur hende tabatin trabou. Ma nan tabata benta e placa aki tambe masha lihe afo.

Y ora cu bisa nan esaki anto nan tabata bisa, placa ta pa lora, loke ta un berdad mes grandi cu mundo. Y den pone placa lora nan tabata berdadero experto. Tabata tempo cu nan tabata haya masha hopi cen.

Ma no solamente nan so tabata saca placa

bruto. Dia cu tabatin barco aden tur hende tabata busca manera pa gana cen con cu ta. Un tabata hacie di miho manera cu e otro. Nan tabata imagina cos pa por bende.

Tur caminda bo tabata mira nan ta cana ta busca manera di hinca algun hende cu loke cu nan tabatin. Fritanganan tabafa lanta mescos cu padestul.

Y tambe bo tabata mira con cantidad di mohe ta bai ofrece nan curpa a cambio di placa. Di un pa dos bo tabata topa cantidad di nan ta cana den caya ta ofrece nan mes. Anto di un manera agresivo, sin ningun escrupulo. Bo no tabatin e minimo idea di unda nan tabata sali. Ma nan tabata presente, anto con! Nan tabata percura tambe pa e stad haya otro clase di desorden. Otro clase di bida.

Nan tabata hopi mes. No di Santa Marta so, clase di noticia asina ta cana lihe y e mucha mohenan di e zona tambe tabata tira un para ei banda. Di leu bo tabata saca esakinan for di esunnan di e ciudad.

Nan tabata mas reserva, un tiki mas timido, cu un tiki mas miedo! Nan no tabata mucho al tanto di tur loke tabata pasa den e ciudad. Ni sa nan tabata sa con move den e stad. E becindario banda di waf tabata nan teritorio

Y den e dianan cu tabatin barco aden ta masha hopi cos tabata pasa. Y di e muchanan aki bo tabata tin di tur estilo. Un mas bunita cu e otro, ma tur cu e mes un meta.

Bende nan curpa. Anto no clandestinamente, ma abiertamente. Y e matrosnan di e barconan tabata haci uso di e oportunidad aki. Prostitucion tabata florece e tempo nan ei. Riba tur nivel. Di un manera increibel.

Fo'i chikito caba bo tabata haya bo confronta cu e fenomeno aki. E muchanan mohe ta for di chikito tambe nan tabata bin tira un para. Den nan bo tabata haya cu tabata mucha mucha. Ma nan tabata prefera bin ei banda cu keda unda nan tabata biba. Den e pueblecitanan di interior ta trabou so nan tabata pasa. Miseria y desesperacion ta bai hunto. Y cueste loke cueste nan kier a sali for di e situacion aki. Muchanan jong y bunita tabata sali for di nan ambiente bin busca miho porvenir. Esei nan tabata kere. Esei nan tabata spera. Hopi biaha nan tabata haya cosnan pio di loke nan tabatin. Berguensa tabata haci cu nan no tabata bai bek for di unda nan a bin. Esakinan tabata pues e menos afortuna.

Bida di stad sa ta hopi mas duro cu esun di interior. E por ta mas inhumano tambe. Ma e hendenan cu tabata traha den e industria di banana tabata pasa bon. Nan tabata gana bon. Biba a lo ya-se-sa! Sin ningun sorto di preocupacion.

Den su tempo di bonansa zona bananera a benta masha hopi placa afo. Sin tin mester! Pa buena bida! A malgasta sin misericordia! Placa tabata core manera awa. Y esei pasobra esaki tabata drenta sin ningun dificultad. Anto pakico worry?